

IZVJEŠTAJ SA 72. GENERALNE KONFERENCIJE I KONGRESA
SVJETSKIH BIBLIOTEKA I INFORMACIONOG KONGRESA
IFLA-e, SEOUL, KOREJA 20-24. avgust 2006

REPORT FROM WORLD LIBRARY AND INFORMATION CONGRESS:
72nd IFLA GENERAL CONFERENCE AND COUNCIL, AUGUST 20-24 2006

Merima Botulja

Nacionalna i univerzitetska biblioteka Bosne i Hercegovine
Sektor za informacije i usluživanje korisnika
National and University Library of Bosnia and Herzegovina
Sector of Information and Services
71 000 Sarajevo
merimab@nub.ba

Main topic of this year's IFLA Congress was »Libraries: Dynamic Engines for the Knowledge and Information Society«. BiH representative and participant of the Congress and Conference of directors of national libraries was Dr. Ismet Ovcina, NULBIH Director.

Generalna konferencija i Kongres svjetskih biblioteka, te Informacioni kongres IFLA-e (Svjetske federacije bibliotečkih asocijacija i institucija), 72. po redu, održan je 20–24. avgusta 2006. godine u Seoulu, glavnom gradu Južne Koreje. Bio je to još jedan u nizu uspjeha IFLA-e i trijumf za Nacionalni organizacioni komitet, te biblioteku i informacionu profesiju u Koreji sa 2.891 učesnikom, 447 dnevnih posjetilaca, 522 odvojene registracije za izložbu, kao i 522 osobe u pratnji.

Pored toga, što su predstavnici svjetskih biblioteka boravili u drevnoj zemlji znanja i kulture, u zemlji u kojoj je u 13. stoljeću izumljen pokretni metalni tip prese za printanje i gdje je 1377. godine nastala prva knjiga printana na ovom stroju, upoznati su i sa ulogom IFLA-e u informacionom društvu. Također, izlaganjem radova bibliotečkih stručnjaka iz cijelog svijeta i njihovim aktivnim učešćem na nizu workshopova pokazano je kako su „biblioteke i informacioni servisi zaista dinamične mašine znanja i informacionog društva“, što je bila i tema ovogodišnjeg kongresa u Seoulu.

Posljednjih godina društvo se ubrzano mijenja, što je naročito vidljivo na polju digitalizacije, razvoju informacionih tehnologija i digitalnih komunikacija. U skladu s tim, vrijeme je da biblioteke intenziviraju suradnju s profesorima bibliotekarstva i bibliotečkim stručnjacima. Osnovni cilj toga je da se udovolji ulozi i funkciji informacionih centara 21. stoljeća kako bi se biblioteke lakše mogle suočiti sa izazovima ovog ubrzanog svijeta. Kako je rečeno na Kongresu, ova tema je odabrana jer se vjeruje da biblioteke trebaju svakodnevno djelovati kao dinamične mašine znanja i informacionog društva, što ujedno treba da bude i misija profesora bibliotekarstva i bibliotečkih profesionalaca u novoj eri – eri digitalizacije. Uspostavljanjem veza s univerzitetima i njihovim profesorima svijet može postati bolje informiran i



Predsjednik IFLA-e Alex Byrne sa direktorom Narodne biblioteke Srbije mr. Sretenom Ugričićem i direktorom NUBBiH dr. Ismetom Ovcina

tolerantniji u korist svih nas. Kako bi bilo moguće to postići svi se moramo suprotstaviti ignoranciji i intoleranciji. Vizija IFLA-e u budućnosti je informaciono društvo koje će koristiti zaista svim ljudima svijeta. Izazovi koji su pred globalnim društvom mogu se okrenuti u korist svih ljudi razvojem novih tehnologija i novih načina razmišljanja. U tu svrhu, kako je zaključeno, IFLA i njene članice će promovirati harmoniju i prosperitet naših nacija.

Misija IFLA je usmjerena ka tri cilja – prema društvu, profesiji i njenim članovima. U posljednje vrijeme suočeni smo sa velikim problemima koji su zadesili naše društvo, posebno one koji se tiču bibliotečke profesije. Također, IFLA je fokusirana na specifične ciljeve naše profesije uključujući bibliografske standarde, mjerenja i procjene, te profesionalnu komunikaciju. Naravno, između ostalog, na Kongresu su razmatrani i ovi ciljevi IFLA-e.

„Primjenjujući naše znanje, vještine i etičke vrijednosti kao informacioni profesionalci mi doprinosimo razvoju informacionog društva uopće. U našem dnevnom radu i putem naših servisa mi omogućavamo našim klijentima da vide, također, mi im svojim radom dokazujemo kako su biblioteke informaciono društvo u akciji“ – kazao je u svom obraćanju učesnicima Kongresa Alex Byrne, predsjednik IFLA-e.

Bosna i Hercegovina, Nacionalna i univerzitetska biblioteka BiH svakako je dio ovoga informacionog društva, ali i jedina članica IFLA-e iz naše države. Stoga, na ovom kongresu i 33. konferenciji direktora nacionalnih biblioteka, koja je u isto vrijeme održana, kao jedini predstavnik iz Bosne i Hercegovine prisustvovao je dr. Ismet Ovcina, direktor Nacionalne i univerzitetske biblioteke BiH.